

ხაზარდა და ლოტო ქუთაისში

ქუთაისის ჭორიკანობა

(1860 წელი)

3 ივნისს ამა წლისას, ქუთაისში მივიღეთ ივნისის წიგნი „ცისკრისა“ და მაშინვე წავიკითხეთ უფ. მოლაყბის სტატია „ხაზარდაა“. ამ წაკითხვას ანდამატის ქვის ძალა ჰქონდა ყველაზე. საკმაო იყო, რომ ერთს წაეკითხა. რაღაცა ბედზედ პირველმა წამკითხველმა იმავე საღამოს გამოაცხადა შეკრებულებაში „ხაზარდას“ საგანი. ვისაც კი მოუღის „ცისკარი“, იმავე ღამეს წაიკითხეს, მაგრამ ვისაც არ გამოუწერია წრეულს „ცისკარი“, არც ის დარჩა პირდაღებული. არ იყო იმისთანა „ცისკრის“ გამომწერი, რომ ორს ან სამს არ ეთხოვა მისთვის „ცისკარი“: „ხაზარდა რომ წერია, ის მათხოვეო“. მრავალმა იცნო თავისი თავი მეთუთუნეს და ხუროს ცოლებში.

აქ, ქუთაისში, ხაზარდა დიდ მოღაშია. შესანიშნავია, რომ ეს ქალაქი ასრულებს პარიჟის ბძანებებს მოღების ნაწილზედ (ყველამ იცის, რომ პარიჟიდგან მოღის ახალი მოღები). მაგრამ როდესაც ის ბძანება გამოიცვლება, მაშინ კი არ დაყობა პარიჟს ნებაზედ. ასე რომ, ქუთაისში შეიძლება, რომ კაცმა ნახოს ყოველი ხნის ტანისამოსი, ძველი და ახალი. ნათქვამია, რომ ვინც კანონს დასდებს, მან დასჯაც უნდა დასდვას იმაზედ, ვინც იმ კანონს არ დასრულებსო. ეს იმაზე ვთქვი, რომ პარიჟი რადგან მოღების კანონებს სდებს, დასჯაც უნდა დასდვას მის აუსრულებლობისათვის. პარიჟში რომ ხაზარდა შემოიღეს, აქ მაშინვე უცფათ გაიკეთეს ხაზარდა და ეხლა, როდესაც პარიჟში ძალიან ცოტას აცვია ხაზარდა, აქ უფრო და უფრო განიერებს იკეთებენ. სჯობდა, რომ ეს მოღა სულ არ შემოეღოთ, მაგრამ ეხლა პარიჟმა შეიტყო ზარალი ამა მოღისა და როდესაც იქ გარდააგდეს, ყველა ჟურნალებმა აქეს ეს გარდაგდება ხაზარდისა. ისინი ამბობდნენ მაშინ, რომ დიდი ხანია დრო იყო ამ მოღის გარდაგდებისაო. აქ უშველებელ რიცხვი იყიდება, დღითი დღე უფრო და უფრო გასავალი აქვთ იმ მავთულებს. ყოველ ფოჩტის დღეს აქ მოღის რამოდენიმე ასი არშინი ხაზარდა გასაყიდავათ. მოღის გარდა ცოტა შემატება კი არ იქნება ხაზარდის გარდაგდება! რა არის ეს ფოლაღების მავთულები. ჯერ თავათ ხაზარდას ფასი აქვს, მერე ხაზარდაზედ ჩასაცვამი კაბა განიერი უნდა იყოს, - ეს ორი. ამასთანავე, აქაური ხაზარდა მე მგონია პრივილეგიროფანის ფაბრიკაში არ არის გაკეთებული ამიტომაც რომ მალე ტყდება და ამისათვის გამოცვლა უნდა, მალმალე უნდა იყიდოს, ისე უხაზარდოთ არ გაიაროს. გატეხილის ხაზარდის თავები რქებისავით ექნება გამოშვერილი, არც ასე გაივლის, უასლოთ არ შეიძლება სიარული, ამასაც ფასი აქვს, ესეც სამი ზარალი ხაზარდისა. უფ. ჩვენი მოლაყბე უფრო კარგათ მოსთვლის ხაზარდის ზარალს.

ამ ხაზარდას რომ გარდააგდებენ, მე სწორედ იმისთანა თავლის სამთელს დავანთებ ხატის წინ, რომ ხის სიმსხო იყოს, როგორც ამბობს გოროდნიჩი გოგოლის კომედიამი - „რევიზორი“. ბევრნი ამბობენ, რომ სამადლობელ პარაკლისს გარდავახდევინებთო, ამიტომ რომ ქუთაისში პატარა და ვიწრო სახლებია და ხაზარდას გამო სახლში აღარ უშობენ კაცებს. ამ მოღის გარდაგდება კი არ იამებათ ვაჭრებთ,

ამიტომ რომ ზოგიერთ იმათგანს მაკარიის იარმუკიდგან დაუბარებიათ ათას-ათასობით ხაზარდა. თავის ზარალი ვის ეამება!

ქუთაისი ერთი პატარა ნაწილია ტფილისისა. ამის მსგავსად ქუთაისში არის პატარა ნაწილი ტფილისის „პალე როიალისა“. ამ ნაწილს შეადგენენ მრავალნი იქ და აქ დაფანტული მაღაზინები ევროპიელ ვაჭრებთა. ეს მაღაზინები დღითი-დღე სავსენი არიან ქალებითა, და რადგან აქ მაღაზინებს აკეთებენ ვიწრო-ვიწროს, სულ გაჭედილნი არიან მათი კაბებითა. ძალიან სასარგებლო იქნება, რომ აქ ორი ან სამი მაღაზინები ერთად შეაერთონ, არა საქონელის დასატევისათვის, - მყიდველებისათვის. ქ. ტფილისის „პალე როიალში“ რომ საქმეებია, აქაც ბევრი არიან იმისთანები. აქ ძალიან ბევრნი არიან მეთუთუნეს ცოლის მსგავსნი, არც ხუროს ცოლის მსგავსებშია აქ დასაკვლისი.

ძალიან გამაგრებულათ ბუდობს აქ ერთი ძველი მოდა: ლოტტო. აქაურ ქალებს არ შეუძლიან ერთი ღამე გაატარონ ისე, რომ ლოტტო არ ითამაშონ. ეს საშინლათ თავის შესაწყენი თამაშობა შეაქცევთ მათ, ორს, სამს და ხან და ხან ოთხის საათის განმავლობაში. გასაკვირველია, რომ მათ არ შეაწყენს თავს. თუ ვინმეს გნებავთ ამ თამაშობით თავის შეწყენა იგრძნოთ, მეოთხედი საათი ითამაშე და მგონია თქვენ დღეში თვალის დასანახავათაც შეგზარდეთ. ეს თამაშობა ქალებისათვის და პრეფერანსი კაცებისათვის არიან აქ უპირველესნი თამაშობანი, მაგრამ აქ ლაპარაკი ჩამოვარდა ლოტტოზედ. მართალია რომ ლოტტო ისე საშინლად ჯიბეს არ ათხელებს როგორც მორა-ანტიკი, რომელსაც მოდა აღარ სწყალობს და მის მაგიერათ წყალობს ფრანცუზულს მორალს, მაგრამ ჯიბის მაგიერათ თვალებს ავნებს. სამაგლად ავნებს ეს თამაში მათ, ვინც ძალიან მხიარულნი არიან. თუკი ვინმემ დაილაპარაკა ან გაიცინა, მაშინვე ისმის „აა! შენი ჭირიმე, განიმეორეთ უკანასკნელი ნომერი, ბძანეთ, ბძანეთ“. ეს ორი ან სამი საათი ასე უსაუბროთ გატარებული ძალიან ასიამოვნებთ ქალებს. ეს ნომერი რომ ამბო გავაკეთო, ანტერნო, ან მოვიგო, ძალიან ავნებენ ქალებს. არ შეიძლება რომ თამაშობაში ადგილი არ გამოიცვალონ, ვითომ ადგილიდან არის მოგება და წაგება. ყოველმხარედგან ისმის: „აურიეთ“, „აურიეთ“; ამას მოუმატეთ; „ტრიცატ პიატ“, „სოროკ ვოსემ“ და აი ლოტტო!

ტექსტის ციფრული ვერსია მოამზადა:

საჩხერის მუნიციპალიტეტის სოფელს სავანის საჯარო სკოლის მოსწავლემ **ნინო გულიაშვილმა**.

12 აპრილი, 2020 წელი

#დარჩისახლში